



BOLETÍN OFICIAL DO PARLAMENTO DE GALICIA

Número 142

VIII lexislatura

23 de decembro de 2009

Fascículo 3

SUMARIO

(Versión electrónica en www.parlamentodegalicia.es)

1. Procedementos de natureza normativa

1.2. Proxectos e proposicións de lei

1.2.1. Proxectos de lei

Emendas á totalidade formuladas ao Proxecto de lei de modificación de diversas leis de Galicia para a súa adaptación á Directiva 2006/123/CE do Parlamento Europeo e do Consello, do 12 de decembro de 2006, relativa aos servizos no mercado interior [08/PL-0010(15720)]

Emenda á totalidade de devolución

— Do G. P. do Bloque Nacionalista Galego (doc. núm. 17452)

[36643](#)

1.2.2. Proposicións de lei

Ditame emitido pola Comisión 3.^a, Economía, Facenda e Orzamentos sobre a Proposición de lei de modificación do Decreto lexislativo 1/2005, do 10 de marzo, polo que se aproba o texto refundido das

leis 7/1985, do 17 de xullo e 4/1996, do 31 de maio, de caixas de aforros de Galicia [08/PPL-0003(8892)]

[36626](#)

7. Composición do Parlamento, réxime e goberno interior, organización e funcionamento

7.3. Organización e funcionamento do Parlamento

7.3.3. Convocatorias

— Sesión plenaria (día 29 de decembro de 2009, ás 10:00 horas)

[36641](#)

1. Procedementos de natureza normativa

1.2. Proxectos e proposicións de lei

1.2.1. Proxectos de lei

Emendas á totalidade formuladas ao Proxecto de lei de modificación de diversas leis de Galicia para a súa adaptación á Directiva 2006/123/CE do Parlamento Europeo e do Consello, do 12 de decembro de 2006, relativa aos servizos no mercado interior

A Mesa da Comisión 1.^a, Institucional, de Administración Xeral, Xustiza e Interior, na reunión do 22 de decembro de 2009, adoptou o seguinte acordo:

Cualificación de emendas:

- 08/PL-0010(15720)

Presidencia da Xunta de Galicia

de modificación de diversas leis de Galicia para a súa adaptación á Directiva 2006/123/CE do Parlamento Europeo e do Consello, do 12 de decembro de 2006, relativa aos servizos no mercado interior

BOPG núm. 133, do 11.12.2009

Examinado o escrito presentado e dado que se axusta ao requisitos establecidos no Regulamento da Cámara, acordan a súa admisión co seguinte detalle:

Emenda á totalidade de devolución

Do G. P. do Bloque Nacionalista Galego (doc. núm. 17452)

Santiago de Compostela, 23 de decembro de 2009

José Manuel Baltar Blanco

Presidente en funcións

1.2.2. Proposicións de lei

Ditame emitido pola Comisión 3.^a, Economía, Facenda e Orzamentos sobre a Proposición de lei de modificación do Decreto lexislativo 1/2005, do 10 de marzo, polo que se aproba o texto refundido das leis 7/1985, do 17 de xullo e 4/1996, do 31 de maio, de caixas de aforros de Galicia

A Comisión 3.^a, Economía, Facenda e Orzamentos, na súa sesión do día 23 de decembro de 2009, adoptou o seguinte acordo:

Aprobación do ditame pola comisión

- 08/PPL-0003(8892)

Grupo Parlamentario do Bloque Nacionalista Galego

De modificación do Decreto lexislativo 1/2005, do 10 de marzo, polo que se aproba o texto refundido das leis 7/1985, do 17 de xullo e 4/1996, do 31 de maio, de caixas de aforros de Galicia

BOPG núm. 85, do 30.09.2009

Santiago de Compostela, 23 de decembro de 2009

José Manuel Baltar Blanco

Presidente en funcións

Ditame emitido pola Comisión 3.^a, Economía, Facenda e Orzamentos, sobre a Proposición de lei de modificación do Decreto lexislativo 1/2005, do 10 de marzo, polo que se aproba o texto refundido das leis 7/1985, do 17 de xullo, e 4/1996, do 31 de maio, de caixas de aforros de Galicia

A Comisión 3.^a, Economía, Facenda e Orzamentos, na sesión do día 23 de decembro de 2009, á vista do Informe elaborado pola Ponencia sobre a Proposición de lei de modificación do Decreto lexislativo 1/2005, do 10 de marzo, polo que se aproba o texto refundido das leis 7/1985, do 17 de xullo, e 4/1996, do 31 de maio, de caixas de aforros de Galicia, de conformidade co disposto nos artigos 116 e seguintes do Regulamento do Parlamento de Galicia, aprobou o seguinte:

DITAME

Exposición de motivos

O Estatuto de autonomía de Galicia, no seu artigo 30.I.5, indica que, de acordo coas bases e a ordenación da actuación económica xeral e a política monetaria do Estado, lle corresponde á Comunidade Autónoma galega, nos termos do disposto nos artigos 38, 131, 149.1, 11 e 13 da Constitución, a competencia exclusiva en materia de caixas de aforros.

Nesta modificación legislativa preténdese afondar no exercicio e reforzamento destas competencias estatutarias, considerando a especial natureza xurídica deste tipo de entidades, á vez mercantís e á vez fundacionais. As caixas de aforros son entidades financeiras, pero de indisoluble natureza fundacional. Deste xeito, a súa vertente benéfico-social vese irremediabilmente unida á súa actividade financeira, polo que precisa da eficiencia e da solvencia desta.

A crise financeira actual está a deixar sentir a súa pegada no financiamento do tecido empresarial vinculado aos sectores produtivos estratéxicos da nosa economía. As caixas de aforros, alén do seu carácter de entidades que se dedican aos servizos financeiros, teñen unha vocación social e unha vinculación co territorio no que se asentán, debido á súa natureza fundacional, sendo un instrumento fundamental no financiamento da economía galega. Esta función ha servir para contribuír a mellorar o nivel socioeconómico de Galicia, que devén máis necesaria nunha situación como a actual de recesión económica e de dificultades financeiras.

En termos xerais, as modificacións introducidas nesta lei pretenden afondar tanto nunha modernización da representación territorial, institucional e privada coma nunha eficacia no seu funcionamento e cumprimento de funcións. Incídese decisivamente na independencia e despolitización destas entidades restrínxese o acceso a cargos electos, altos cargos e similares.

De cara a unha maior transparencia e seguridade xurídica, dótase de carácter constitutivo o rexistro de altos cargos, que deixa de ter un carácter meramente informativo.

Respectando a actual natureza xurídica e a tradicional vinculación territorial das caixas, esta modificación legislativa pretende adaptar a representación dos órganos de goberno á realidade territorial actual, considerando o ámbito das entidades e a representatividade das súas institucións. Deste xeito dáselle entrada na representación ao Parlamento de Galicia e modifícase o sistema de elección das entidades representativas de intereses sociais.

Avánzase na despolitización destas entidades e establécese a incompatibilidade dos cargos electos e altos cargos para acceder a postos nos órganos de goberno. Ao tempo, búscase

a especial cualificación das persoas que accedan en representación pública ou representativa.

Enuméranse as diferentes comisións delegadas do consello de administración e increméntase a periodicidade mínima de reunións da comisión de control.

Establécense as causas de incompatibilidade e o cesamento dos conselleiros xerais e o xeito de acceso ao consello de administración e á comisión de control.

Aclárase a autorización dos sistemas institucionais de protección, figura creada con posterioridade á anterior lei, aínda que figuraba implicitamente prevista no artigo 35.3 do noso texto refundido.

Trátase, en suma, de modernizar os órganos de goberno, dotándoos de maior independencia e autonomía e recollendo a pluralidade e realidade social e política actual.”

Artigo 1.- Modificacións no título I do Decreto legislativo 1/2005, do 10 de marzo, polo que se aproba o Texto refundido das leis 7/1985, do 17 de xullo, e 4/1996, do 31 de maio, de caixas de aforros de Galicia

Modifícanse os artigos que seguidamente se relacionan do título I do Decreto legislativo 1/2005, do 10 de marzo, polo que se aproba o Texto refundido das leis 7/1985, do 17 de xullo, e 4/1996, do 31 de maio, de caixas de aforros de Galicia:

Un. O artigo 2 queda redactado nos seguintes termos:

“ Artigo 2. Concepto de caixa de aforros

Entenderase por caixa de aforros, para os efectos deste texto refundido, a entidade financeira de carácter social, de natureza fundacional e sen finalidade lucrativa que, baixo o protectorado público exercido polo Goberno da Comunidade Autónoma de Galicia a través da consellaría competente en materia de política financeira, se dedica á actividade financeira e á prestación de servizos conexos, destinando parte dos seus excedentes a accións sociais e contribuíndo a un maior desenvolvemento socioeconómico de Galicia.”

Dous. O artigo 5 queda redactado nos seguintes termos:

“Artigo 5. Acción de goberno

A acción do Goberno da comunidade autónoma, no marco das bases e da ordenación da actividade económica xeral e da política monetaria do Estado, levarase a cabo baixo os seguintes principios:

a) Velar pola independencia das caixas de aforros e defender a súa natureza fundacional, prestixio e estabilidade.

b) Vixiar o cumprimento por parte das caixas de aforros da súa función económico-social, de acordo cunha adecuada política de administración e de investimento de aforro privado.

c) Procurar a estabilidade económica e financeira das caixas de aforros así como a total transparencia dos mercados onde operan, creando os mecanismos oportunos para que os clientes das caixas dispoñan de toda a información necesaria.

d) Establecer mecanismos de cobertura e protección dos clientes.

e) Estimular todas as accións lexítimas das institucións de aforro encamiñadas a mellorar o nivel socioeconómico de Galicia.

f) Garantir os principios de democratización, transparencia e eficacia na configuración, elección e funcionamento dos órganos de goberno das caixas de aforros.

g) Fomentar a cooperación das caixas de aforros galegas.

h) Velar para que exista unha organización administrativa e contable, e procedementos de control internos axeitados.

Artigo 2.- Modificacións no título II do Decreto legislativo 1/2005, do 10 de marzo, polo que se aproba o Texto refundido das leis 7/1985, do 17 de xullo, e 4/1996, do 31 de maio, de caixas de aforros de Galicia

Modifícanse os artigos que seguidamente se relacionan do título II do Decreto legislativo 1/2005, do 10 de marzo, polo que se aproba o Texto refundido das leis 7/1985, do 17 de xullo, e 4/1996, do 31 de maio, de caixas de aforros de Galicia:

Un. O artigo 6 queda redactado nos seguintes termos:

“Artigo 6. Principios xerais de actuación das caixas de aforros

1. As caixas de aforros teñen un dobre carácter: social e fundacional, pola súa finalidade e aplicación de excedentes, e de entidade financeira, por razón da súa actividade.

2. As caixas de aforros garantirán unha xestión eficaz dos recursos que lles son confiados, para o que asegurarán a súa estabilidade, o coidado permanente da súa solvencia e a aplicación do excedente económico aos fins previstos neste texto refundido.

3. Os órganos de goberno das caixas de aforros actuarán con dilixencia, lealdade e confidencialidade.”

Dous. O artigo 7 queda redactado nos seguintes termos:

“Artigo 7. Organización democrática

1. A estrutura e a composición dos órganos de goberno das caixas de aforros serán democráticas.

2. Os membros dos órganos de goberno das caixas de aforros coidarán dos intereses fundacionais da caixa, dos seus depositantes e do territorio onde estas desenvolvan a súa actividade, con plena independencia de calquera outro interese que lles puidese afectar.

3. Así mesmo, garantirán a transparencia e eficacia nas actividades que desenvolvan, para o que favorecerán a participación dos impositores e clientes nos asuntos de interese para as caixas de aforros, difundirán dun xeito constante información obxectiva sobre a súa situación e promoverán o emprego das novas tecnoloxías da información.”

Tres. O artigo 15 queda redactado nos seguintes termos:

“Artigo 15. Situación de déficit patrimonial

Cando os recursos propios dunha caixa resultasen insuficientes para garantir a solvencia da entidade, deberá producirse:

a) Novas achegas dos fundadores, suficientes para cubrir o déficit patrimonial existente.

b) A incorporación de persoas ou entidades públicas ou privadas que, con idéntica consideración xurídica ca os fundadores, acheguen en concepto de ampliación do fondo fundacional os recursos suficientes para cubrir o déficit existente.

c) Calquera outra medida prevista na normativa básica do Estado, logo de autorización dos órganos competentes da Comunidade Autónoma de Galicia de acordo coa normativa vixente.

Catro. Engádenselle ao artigo 18 as alíneas 4 bis e 5 bis coa seguinte redacción:

“4 bis. O órgano competente para acordar a emisión de cotas participativas é a asemblea xeral. O acordo de emisión debe ser autorizado pola consellaría competente en materia de política financeira.”

“5 bis. A caixa de aforros levará un rexistro de cotaparticipes.”

Cinco. O artigo 23 queda redactado nos seguintes termos:

“Artigo 23. Rexistro de órganos de goberno e de altos cargos

1. Na consellaría competente en materia de política financeira existirá un rexistro público no que se deberán inscribir os nomeamentos, reeleccións e ceses dos membros dos órganos de goberno e dos directores xerais das caixas de aforros con domicilio social en Galicia.

2. O contido e o acceso ao rexistro dos órganos de goberno e de altos cargos das caixas de aforros galegas desenvólvese regulamentariamente. En todo caso, a inscrición neste rexistro ten carácter constitutivo, de xeito que os nomeamentos, reeleccións e ceses non terán eficacia vinculante e executiva ata a comunicación á entidade da inscrición daqueles.

3. O prazo para a inscrición e notificación á entidade será dun mes a partir da entrada na consellería competente en materia de política financeira da solicitude de inscrición, solicitude que deberá remitirse nun prazo máximo de dez días desde o acordo, xunto coa documentación xustificativa do nomeamento, da reelección ou do cesamento. O silencio administrativo terá carácter positivo.

4. As altas e baixas deste rexistro serán notificadas ao Banco de España. Poderá emitirse certificación a instancia de calquera persoa que xustifique o seu interese.”

Seis: O artigo 24 pasa a formar parte da Sección primeira do Capítulo III do Título II e queda redactado da seguinte maneira:

“Artigo 24. Funcionamento dos órganos de goberno

1. Correspóndelle ao presidente de cada órgano de goberno, ademais da representación do órgano:

a) Ordenar a convocatoria das sesións e fixar a orde do día, tendo en conta, se é o caso, as peticións formuladas polos demais membros do órgano, segundo o procedemento e os prazos que se prevexan nos estatutos.

b) Presidir as sesións, moderar os debates, suspendelos por causas xustificadas e dirimir co seu voto os empates.

c) Asinar as actas e as certificacións dos acordos do órgano.

2. Correspóndelle ao secretario de cada órgano de goberno:

a) Efectuar a convocatoria das sesións por orde do seu presidente e citar os membros do órgano coa antelación que se sinala nos estatutos, remitíndolles a documentación necesaria para a análise dos asuntos que figuren na orde do día.

b) Realizar as comunicacións do órgano cos seus membros e coas administracións públicas ás que teña que remitir a documentación.

c) Redactar e autorizar as actas das sesións e expedir as certificacións dos acordos adoptados.

3. A convocatoria e a remisión da información que deban analizar os membros dos órganos de goberno poderá realizarse por medios informáticos sempre que garantan a confidencialidade e impidan a súa difusión pública.

4. Calquera membro dun órgano de goberno poderá solicitar copia das actas dos acordos adoptados polo dito órgano, debendo serlle remitida nun prazo máximo de dez días. O

contido destas actas estará suxeito ao deber de confidencialidade.

5. Os membros dos órganos de goberno das caixas de aforros estarán obrigados a gardar secreto respecto das informacións e confidencias que coñezan no exercicio das súas funcións.

6. As deliberacións dos órganos de goberno serán secretas, a menos que o propio órgano acorde expresamente a posibilidade de difusión.

7. Os estatutos das caixas de aforros regularán a forma en que haberán de facerse públicos os acordos dos seus órganos de goberno.

Porén, os órganos de goberno poderán restrinxir a difusión dos seus acordos durante o tempo e na medida en que resulte necesario para a súa actividade.

8. A violación do deber de secreto constitúe xusta causa de cesamento das previstas neste texto refundido, sen prexuízo das responsabilidades que puidesen proceder.”

Sete. O artigo 25 queda redactado nos seguintes termos:

Artigo 25. Asemblea xeral

1. A asemblea xeral é o órgano supremo de goberno e decisión das caixas de aforro, e consta de 160 membros, que ostentan a denominación de conselleiros xerais.

2. Os sectores representados na asemblea xeral e as porcentaxes de representación son os seguintes:

a) A Comunidade Autónoma a través do Parlamento de Galicia: co 20%.

b) Corporacións locais en cuxo termo teña oficinas a entidade: co 20%.

c) As entidades representativas de intereses colectivos: co 10%. Dentro desta porcentaxe, o 25% será para as entidades representativas das confederacións de empresarios de Galicia, outro 25% para as organizacións sindicais máis representativas de Galicia, outro 25% para as restantes entidades con representación no Consello Económico e Social de Galicia,

non mencionadas anteriormente, que non teñan a consideración de administración institucional ou corporativa, e o outro 25% para as asociacións e institucións de carácter benéfico ou social de recoñecido prestixio e representatividade no ámbito territorial de actuación da caixa de aforros, designadas por orde da consellaría competente en materia de política financeira, logo de consultadas as entidades.

d) Empregados da caixa de aforros: co 10%. Os representantes dos empregados terán as mesmas garantías cas establecidas no Estatuto dos Traballadores para os representantes legais dos traballadores.

e) Entidades fundadoras: ata o 10% na proporción que figure nos estatutos de cada caixa. No caso de non existir entidades fundadoras, ou non acadar o 10%, a súa representación atribuirase á Comunidade Autónoma de Galicia e ás corporacións locais a partes iguais.

f) Impositores: co 30%.

A representación das administracións públicas e das entidades e corporacións de dereito público nos órganos de goberno, incluída a que corresponda ás entidades fundadoras cando estas teñan a mesma natureza, non poderá superar no seu conxunto o 50% do total dos dereitos de voto en cada un de tales órganos tendo que estar representadas todas as entidades e corporacións.

No caso de que por motivo do número de membros da asemblea xeral o número de representantes non sexan números enteiros, procederase a efectuar o redondeo por defecto e atribuiranse os restos de xeito proporcional ao decimal máis alto. No caso de haber dous grupos co mesmo decimal, terá preferencia segundo a orde da letra establecida neste texto refundido. No caso de que, por aplicación do redondeo, a representación pública puidera superar o 50% do órgano, o grupo ou os grupos que o fixesen superar cederá a orde aos seguintes non públicos. Idéntico criterio seguirase nos restantes órganos do goberno.

3. A designación dos representantes de cada sector deberá realizarse, tendo en conta as seguintes normas:

a) A representación do Parlamento de Galicia corresponderá á persoas residentes na Comunidade Autónoma de Galicia,

elixidos polo Pleno da Cámara, e respectarase a proporcionalidade dos grupos parlamentarios da Cámara.

b) A representación das corporación locais corresponderalles a persoas nomeadas polo Pleno da corporación por maioría, na proporción que resulte da composición desta. No caso de que sexa un a elixir, o será por maioría absoluta.

c) A representación dos impositores e das corporacións municipais deberá gardar proporción coa distribución dos depósitos captados en cada comunidade autónoma. Para tal efecto, o número de membros do sector asinarase por comunidades autónomas en función do volume de depósitos que supoñan as oficinas.

d) Os representantes dos empregados serán elixidos polos propios empregados da caixa de aforros de xeito proporcional aos votos obtidos nas listas presentadas. A elección realizarase por votación persoal e secreta de todo o persoal que teña, no momento da votación, unha antigüidade mínima de dous anos no cadro de persoal da caixa de aforros.

e) As entidades fundadoras dunha caixa de aforros non poderán estar representadas nos órganos de goberno de ningunha outra caixa que opere total ou parcialmente no mesmo territorio.

f) Os representantes dos impositores serán elixidos mediante sorteo público, notarial, directo e aleatorio, e manterán a proporción coa distribución de recursos alleos captados en cada comunidade autónoma. No sorteo extraeranse, ademais, un número de suplentes que duplique ao de titulares.

g) Os empregados da caixa de aforros poderán acceder aos órganos de goberno exclusivamente en representación dos empregados e, de xeito extraordinario, en representación das entidades locais.

h) As persoas nomeadas en representación das corporacións locais, do Parlamento de Galicia, das entidades fundadoras e das entidades representativas de intereses colectivos deberán ter os coñecementos ou a experiencia en materia económica, financeira ou xurídica que lles permita adoptar as decisións que lle afecten á entidade, con coñecemento dos seus posibles efectos e das responsabilidades que asuman. Así mesmo, non poderá recaer en persoas que ostenten un cargo

por mandato representativo, nin en persoas incluídas no ámbito de aplicación da Lei 9/1996, do 18 de outubro, de incompatibilidades dos membros da Xunta de Galicia e altos cargos da Administración autonómica, nin no persoal eventual ou directivo das corporacións locais.

Oito. O artigo 26 queda redactado nos seguintes termos:

“Artigo 26. Requisitos dos conselleiros xerais

1. Os conselleiros xerais deberán reunir os seguintes requisitos:

a) Ser persoa física con residencia habitual na zona de actividade da caixa de aforros.

b) Ser maior de idade e non estar incapacitado.

c) Os representantes dos impositores deberán ter a condición de depositantes con dous anos de antigüidade, como mínimo, no momento da súa elección, así como un saldo medio en conta no semestre precedente non inferior a 500 euros. Este importe poderá ser revisado periodicamente pola consellaría competente en materia de política financeira tendo en conta a evolución do índice de prezos ao consumo.

d) Estar ao corrente no cumprimento das obrigas que tivesen contraídas coa caixa de aforros, por si mesmo ou en representación doutras persoas ou entidades.

e) Non estar incurso das causas de inelixibilidade ou incompatibilidade que se recollen neste texto refundido.

f) Non ter cumpridos os 70 anos.

A perda de calquera dos requisitos anteriores, incluído o cumprimento da idade prevista no punto f), será considerada causa de cesamento por supor a perda dos requisitos esixidos para o desempeño do cargo, conforme o previsto no artigo 30 deste texto refundido.

2. Idénticas condicións esixiranse para representar á caixa de aforros tanto en sociedades participadas, fundacións ou outros entes, como para ocupar postos nos órganos de goberno en fundacións, entes ou sociedades dependentes da caixa de aforros.”

Nove. O artigo 28 queda redactado nos seguintes termos:

“Artigo 28. Incompatibilidades

Os membros dos órganos de goberno non poderán estar vinculados á caixa de aforros ou a empresas participadas por esta en máis dun 20% directa ou indirectamente, ou nas que exerzan unha posición de dominio, por contratos de obra, servizos, subministracións, traballos retribuídos ou postos en órganos de goberno durante o período no que exerzan esta condición e nos dous anos seguintes ao seu cesamento, agás a relación laboral cando a condición de conselleiro xeral recaia nun empregado da caixa de aforros.”

Dez. O artigo 31 queda redactado nos seguintes termos:

“Artigo 31. Funcións da asemblea xeral

Correspóndenlle á asemblea xeral as seguintes funcións:

a) Nomear os vogais do consello de administración e da comisión de control entre os membros da propia asemblea xeral.

b) Apreciar as causas de separación dos membros dos órganos de goberno antes do cumprimento do seu mandato, así como acordar a súa separación.

c) Aprobar e modificar os estatutos e os regulamentos dos órganos de goberno.

d) Aprobar a fusión, liquidación e disolución da caixa de aforros, así como os contratos de aseguramento e garantía con outras entidades financeiras, as delegacións de competencias noutros consellos ou entidades e os Sistemas Institucionais de Protección ou figuras análogas.

e) Definir as liñas xerais do plan de actuación da caixa de aforros, ás cales deberán someter a súa actuación o consello de administración, a comisión de control e os órganos directivos da caixa de aforros.

f) Autorizar a emisión de obrigas subordinadas, participacións preferentes, cotas participativas e calquera outro instrumento financeiro computable como recursos propios.

g) Aprobar, se é o caso, a xestión do consello de administración, así como as contas anuais, o informe de xestión e acordar a distribución dos excedentes.

h) Nomear ou revogar os auditores de contas propostos polo consello de administración.

i) Autorizar a creación de novas obras sociais, así como aprobar a liquidación da obra social realizada no exercicio anterior e aprobar os orzamentos para o ano vixente.

j) Ratificar os acordos do consello de administración polo que se nomee o director xeral.

k) Aprobar, por proposta do consello de administración, o código de conduta e responsabilidade social corporativa da caixa de aforros.”

l) Calquera outro asunto que sexa sometido á súa consideración polos órganos facultados para o efecto.

Once. O artigo 32 queda redactado nos seguintes termos:

“Artigo 32. Convocatoria e realización da asemblea xeral

1. A asemblea xeral, ordinaria ou extraordinaria, será convocada polo consello de administración cunha antelación mínima de quince días e máxima dun mes, indicarse a data, o lugar, a hora e a orde do día, así como a data, o lugar e a hora da reunión en segunda convocatoria, e deberá publicarse cunha antelación mínima de quince días no Diario Oficial de Galicia, no BOE e nos periódicos de maior circulación na zona de actuación da caixa de aforros, así como no sitio web institucional.

2. Cunha antelación mínima de quince días, a caixa deberá remitirlles a cada un dos conselleiros xerais a documentación xustificativa dos asuntos que figuren na orde do día. No caso da asemblea xeral ordinaria, entre a documentación remitida deberán figurar as contas anuais e o informe de xestión, a proposta de distribución de excedentes, o informe anual da comisión de control e o informe de auditoría.

3. Para a súa válida constitución en primeira convocatoria a asemblea xeral precisará da asistencia da maioría dos seus

membros. En segunda convocatoria será precisa a asistencia de máis dun terzo dos conselleiros xerais, agás nos supostos nos que se debata a emisión de cotas participativas, a separación de membros dos órganos de goberno, a aprobación ou modificación dos estatutos e dos regulamentos ou a liquidación ou disolución da caixa de aforros, en cuxo caso requirírase a asistencia da maioría dos seus membros.

4. Os acordos tomaranse por maioría simple de votos dos concorrentes, agás nos casos sinalados na alínea anterior, nos que será necesario o voto favorable de dous terzos dos concorrentes.

5. Cada conselleiro xeral ten dereito a un voto, e outorgaráselle a quen presida a reunión voto de calidade. En ningún caso se admitirá a asistencia á asemblea xeral mediante representación, nin a delegación do voto.

6. Presidirá a sesión o presidente do consello de administración e actuará como secretario quen ocupe o cargo de secretario do consello de administración. En caso de ausencia do presidente, será suplido polo vicepresidente e no seu defecto polo vogal do consello de administración de máis idade, mentres que en caso de ausencia do secretario será substituído polo vicesecretario e no seu defecto polo vogal do consello de administración de menor idade.

7. Asistirá á sesión, con voz e sen voto, o director xeral da entidade.

8. Os acordos adoptados obrigan a todos os conselleiros xerais, incluídos os ausentes e os disidentes, e deberán constar en acta, que poderá ser aprobada ao termo da reunión pola propia asemblea, ou polo presidente e dous interventores, designados nela, nun prazo máximo de quince días. A acta terá forza executiva a partir da data da súa aprobación e deberá ser remitida no prazo máximo de quince días á consellaría competente en materia de política financeira.”

Doce. A alínea 2 do [artigo 34](#) queda redactada nos seguintes termos:

“2. A asemblea xeral extraordinaria será convocada polo consello de administración cando o estime conveniente para os intereses sociais, cando o solicite un terzo dos membros da asemblea xeral ou cando o solicite a comisión de control,

sempre que neste último caso, se trate de materias de competencia desta. A petición debe concretar a orde do día da sesión e nesta só poderá tratarse o obxecto para o que foi expresamente convocada, e a convocatoria debe realizarse nun prazo máximo de quince días da presentación da petición sen que poida mediar máis de vinte días entre a data da convocatoria e a sinalada para a realización da asemblea.”

Trece. O [artigo 35](#) queda redactado nos seguintes termos:

“Artigo 35. Funcións do consello de administración

1. O consello de administración é o órgano de administración e xestión ordinaria da entidade, así como da obra social da caixa de aforros, sen máis limitacións cas expresamente reservadas á asemblea xeral e á comisión de control, e poderá delegar a súas facultades en comisións delegadas, entre as que será obrigatoria unha comisión delegada das obras sociais. Así mesmo, constituirá no seu seo unha comisión de retribucións e unha comisión de investimentos.

2. A concesión de créditos, avais e garantías da caixa de aforros aos vogais do consello de administración, aos membros das comisións de control, retribucións e investimentos, ao director xeral ou aos seus cónxuxes ou parellas de feito, ascendentes, descendentes, así como ás sociedades nas que as persoas mencionadas teñan participación que, illada ou conxuntamente, sexa maioritaria, posúan unha posición de dominio ou desempeñen cargos de alta representación, directivo ou asimilado, e o alleamento á caixa de aforros de bens ou valores da súa propiedade ou emitidos por tales entidades deberán ser aprobados polo consello de administración da caixa de aforros e deberanlle ser comunicados á consellaría competente en materia de política financeira para que preste autorización expresa.

3. O consello de administración poderá delegar algunha ou algunhas das súas facultades de xestión nos órganos de goberno das entidades que constitúan e articulen alianzas entre caixas de aforros ou os creados para o efecto no seo da Confederación Española de Caixas de Aforros, coa finalidade de reducir os custos operativos das entidades que a integren, para aumentar a eficiencia sen poñer en perigo a competencia nos mercados nacionais ou para participar con volume suficiente nos mercados internacionais de capital. Esta delegación manterase en vigor durante o período da

alianza ou mentres as entidades non acorden a súa modificación mediante o procedemento que previamente establecesen para o efecto. Esta delegación non se estenderá ao deber de vixilancia das actividades delegadas nin ás facultades que respecto delas teña a comisión de control.

Os acordos de delegación requirirán a autorización previa da consellaría competente en materia de política financeira, para os efectos de garantir que non impliquen menoscabo da independencia da caixa de aforros ou perigo para a súa estabilidade económico-financeira.

No caso de Sistemas Institucionais de Protección, previstos pola normativa de recursos propios, ou figura análoga que se puidera crear, a necesaria autorización previa da consellaría competente en materia de política financeira considerará, entre outras, adicionalmente ao previsto no parágrafo anterior, as consecuencias que puideran derivarse da operación para o cumprimento da finalidade financeira e benéfico-social da entidade en Galicia. Unha vez en funcionamento, será obrigatoria a remisión á citada consellaría da mesma información consolidada ou agregada que deba remitirse ao Banco de España.”

Trece bis. Modifícanse a alínea 1 e os parágrafos segundo e terceiro da alínea 2 do artigo 36 no seguinte senso:

“1. O número de vogais do consello de administración será de vintecinco.”

“No previsto na letra b) do citado artigo 25 garantírase como mínimo a presenza no consello de administración de dúas entidades.”

“No previsto na letra c) do xa citado artigo 25 garantírase igualmente a presenza no consello de administración de polo menos un representante das entidades non fundadoras. Igualmente, o persoal fixo do cadro da caixa de aforros contará cun representante como mínimo. No caso de que por motivo do número de membros do consello de administración o número de representantes non sexan números enteiros, procederase a efectuar o redondeo por defecto, e atribuíranse os restos de xeito proporcional ao decimal máis alto. No caso de haber dous grupos co mesmo decimal, terá preferencia segundo a orde da letra establecida nesta lei. No caso de que, por aplicación do redondeo, a representación

pública puidese superar o 50% do órgano, o grupo ou os grupos que o fixesen superar cederán a orde aos seguintes non públicos.”

Catorce. O artigo 37 queda redactado nos seguintes termos:

“Artigo 37. Nomeamento, causas de inelixibilidade e incompatibilidades.

1. Os vogais do consello de administración serán nomeados pola asemblea xeral de entre os membros de cada sector de representación e por proposta dos conselleiros do respectivo sector que representen cando menos un 15% do total dese sector.

Se por algún dos grupos se formulasen varias propostas, estas serán sometidas previamente a votación entre os conselleiros xerais do grupo, e atribuíranse os postos no consello de administración que a ese grupo lle corresponda en proporción ao número de votos obtidos por cada candidatura proposta.

2. Os vogais do consello de administración estarán afectados polas mesmas causas de inelixibilidade e cesamento que as establecidas para os conselleiros xerais.

Os estatutos da entidade fixarán a idade máxima que poderán ter para o desempeño do cargo, sen que poida ser esta idade superior aos 70 anos. Cumprida esta, será causa inmediata de cesamento e será substituído polo seu suplente.

3. Coa excepción do Parlamento de Galicia, ningunha entidade poderá ter máis dun representante no consello de administración dunha caixa de aforros nin poderá estar representada simultaneamente no consello de administración e na comisión de control da mesma caixa de aforros.

Adicionalmente e coa excepción do Parlamento de Galicia, ningunha persoa ou entidade poderá formar parte nin estar representada no consello de administración ou na comisión de control de máis dunha caixa de aforros.

4. No caso de cesamento ou revogación dun membro do consello de administración antes do termo do seu mandato, será substituído durante o período restante polo seu suplente. Para estes efectos, por cada grupo de representación será

nomeado un suplente por cada titular. En caso de vacante por non existir suplente, esta vacante cubrirase na primeira asemblea que se realice.

Quince. O [artigo 40](#) queda redactado nos seguintes termos:

“Artigo 40. Sesións do consello de administración

“1. O consello de administración reunirse todas as veces que sexa necesario para a boa marcha da entidade, e como mínimo unha vez ao mes. Tamén deberá reunirse cando o solicite un terzo dos vogais do consello de administración. Para a súa válida constitución é precisa a asistencia da maioría dos seus membros.

2. A convocatoria corresponderalle ao presidente, quen determinará os asuntos que deben figurar na orde do día. Cando a convocatoria sexa por petición dun terzo dos vogais do consello, a orde do día recollerá as cuestións expostas polos solicitantes.

3. No caso de ausencia do presidente será suplido polo vicepresidente e no seu defecto polo vogal do consello de administración de máis idade, mentres que en caso de ausencia do secretario será substituído polo vicesecretario e no seu defecto polo vogal do consello de administración de menor idade.

4. Os acordos adoptaranse por maioría dos conselleiros asistentes, agás nos casos nos que os estatutos esixan outra maioría. O Presidente terá voto de calidade.

5. Ás reunións do consello de administración asistirá con voz e sen voto o director xeral, agás para a toma de decisións que o afecten.”

Quince bis. Modifícase o artigo 41 que queda redactado nos seguintes termos:

“Artigo 41. Comisións do consello de administración

1. Ademais das comisións obrigatorias, que se regulan nas seguintes alíneas deste artigo, o consello de administración poderá delegar as súas facultades nunha comisión delegada, agás as relativas á elevación de propostas á asemblea xeral ou cando se trate de facultades especialmente delegadas no consello, salvo que fose expresamente autorizado para iso.

2. A comisión delegada das obras sociais estará formada por tres membros do consello de administración e terá a función de aprobar con carácter previo as actuacións da obra social que non teñan que ser autorizadas polo consello de administración ou pola asemblea xeral. Así mesmo, nos meses de abril, xullo, outubro e xaneiro analizará a execución da obra social no trimestre anterior, e no mes de xaneiro aprobará un informe que elevará ao consello de administración e á comisión de control, sobre a execución da obra social no exercicio anterior.

3. A comisión de retribucións estará formada por tres membros do consello de administración e terá a función de informar ao consello sobre a política xeral de retribucións e incentivos para os membros do consello e, especialmente, para o persoal directivo da entidade.

4. A comisión de investimentos estará formada por tres membros do consello de administración e terá a función de informar ao consello sobre os investimentos e desinvestimentos de carácter estratéxico e estable que efectúe a caixa de aforros, xa sexa directamente ou a través de entidades do seu mesmo grupo, así como sobre a viabilidade financeira dos citados investimentos e a súa adecuación aos orzamentos e plans estratéxicos da entidade. Os membros da comisión serán designados atendendo á súa capacidade técnica e experiencia profesional.

A comisión de investimentos deberá elaborar un informe anual para a súa elevación ao consello de administración, no que deberá incluírse un resumo dos investimentos e desinvestimentos realizados no ano, así como unha relación dos informes emitidos e do seu sentido.

Enténdense como estratéxicos os investimentos e desinvestimentos de participacións significativas en sociedades ou a participación en proxectos empresariais con presenza na xestión ou nos seus órganos de goberno.

5. Todas as comisións delegadas designaraseas o consello de administración de entre os seus vogais. Ningún vogal do consello de administración poderá pertencer a máis dunha das comisións previstas nas alíneas 2, 3 e 4 deste artigo.”

Dezaseis. O [artigo 43](#) queda redactado nos seguintes termos:

“Artigo 43. Comisión de control: composición e reunións

1. A comisión de control contará cun mínimo de seis e un máximo de dez membros con voz e voto, entre os cales necesariamente deberá atoparse un representante de cada un dos sectores de representación. A comisión nomeará entre os seus membros con voz e voto un presidente e un secretario.

2. Asistirá ás reunións da comisión de control, con voz e sen voto, un representante da consellaría competente en materia de política financeira, elixido entre persoas con capacidade e preparación técnica adecuada. Poderá asistir ás reunións da comisión de control, cando sexa expresamente convocado, o director xeral da entidade, con voz e sen voto.

3. A comisión de control reunirse coa mesma frecuencia ca o consello de administración. A convocatoria corresponderalle ao presidente, quen determinará os asuntos que deben figurar na orde do día. Tamén deberá reunirse cando o solicite un terzo dos membros da comisión, en cuxo caso a orde do día recollerá as cuestións expostas polos solicitantes. Para a súa válida constitución é precisa a asistencia da maioría dos seus membros con voz e voto.

4. Os membros da comisión de control e o representante da consellería competente en materia de política financeira poderán solicitar do secretario do consello de administración e do director xeral cantos antecedentes e informacións consideren necesarios para a discusión dos asuntos incluídos na orde do día da sesión.

5. Na primeira semana de cada mes, o secretario do consello de administración deberá remitirles a cada un dos membros da comisión de control, así como ao representante da consellería competente en materia de política financeira, unha relación dos acordos adoptados polo consello de administración e por todas e cada unha das súas comisións delegadas no mes anterior.

6. En caso de cesamento ou revogación dun membro da comisión de control antes do termo do seu mandato, será substituído durante o período restante polo seu suplente. Para estes efectos, por cada grupo de representación será nomeado un suplente por cada titular.

7. Os membros da comisión de control non poderán formar parte nin ocupar ningún cargo nas fundacións que para a xestión da súa obra benéfico-social poidan constituír as caixas de aforros nin naquelas outras das que, tendo sido constituídas polas outras persoas físicas ou xurídicas poidan participar as caixas de aforros.”

Dezasete. Suprimido.

Dezaoito. Suprimido.

Dezanove. Modifícase o artigo 45 que queda redactado da seguinte maneira:

“Artigo 45. O director xeral

1. O director xeral será nomeado por maioría absoluta polo consello de administración entre persoas con capacidade, preparación técnica e experiencia suficiente para realizar as funcións do cargo, e que non concorran neles ningunha das circunstancias previstas no artigo 27 deste texto refundido. Este nomeamento deberá ser ratificado pola asemblea xeral e comunicado á consellaría competente en materia de política financeira, con carácter previo á súa toma de posesión.

2. O director xeral cesará por xubilación ou por alcanzar a idade de setenta anos, e poderá ser removido do seu cargo:

a) Por acordo de separación adoptado por maioría absoluta do consello de administración, que deberá ser ratificado pola asemblea xeral e comunicado á consellaría competente en materia de política financeira con carácter previo á súa efectividade.

b) En virtude de expediente disciplinario instruído pola consellaría competente en materia de política financeira, por propia iniciativa ou por proposta do Banco de España.

3. O director xeral realizará as funcións que lle atribúan os estatutos da entidade e as que lle delegue expresamente o consello de administración, ben con carácter xenérico, ben con carácter especial, e en particular dirixirá a actuación dos órganos executivos da caixa e desempeñará a dirección superior do persoal.”

Vinte. A letra d) da alínea 2 do artigo 51 queda redactada nos seguintes termos:

“d) A xustificación económica do proxecto de fusión, na cal se incluírá unha memoria detallada na que se acrediten os

requisitos previstos no artigo 54 deste texto refundido, a organización resultante, o programa estratéxico da nova entidade que subscribirán os administradores das entidades participantes no proceso de fusión e as posibles consecuencias da fusión sobre o emprego.”

Vinte e un. O artigo 54 queda redactado nos seguintes termos:

“Artigo 54. Autorización das fusións

1. As fusións das caixas de aforros deberán ser autorizadas pola consello da Xunta de Galicia, logo de solicitude conxunta das entidades que pretenden a súa fusión.

A fusión dunha caixa de aforros galega con outra que teña o seu enderezo social fóra de Galicia deberá ser autorizada conxuntamente polos órganos competentes das comunidades autónomas afectadas e determinarase, no acto autorizatorio, a proporción que lles corresponderá ás administracións públicas, ás entidades e ás corporacións de dereito público de cada Comunidade nos órganos de goberno da caixa de aforros resultante da fusión.

Para conceder a autorización valorarase que o enderezo social da caixa resultante da fusión se fixe en Galicia e que se manteña unha axeitada presenza territorial das oficinas en Galicia.

2. Para conceder a autorización serán requisitos indispensables entre outros:

a) Que a entidade absorbida ou as que desexen fusionarse non estean en liquidación.

b) Que non derive prexuízo para as garantías dos impositores ou acredores das caixas de aforros que pretendan integrarse.

3. Regulamentariamente determinaranse os requisitos, as condicións e o procedemento que se deberán cumprir no proceso de fusión.”

Artigo 3.- Modificacións no título III do Decreto legislativo 1/2005, do 10 de marzo, polo que se aproba o Texto refundido das leis 7/1985, do 17 de xullo, e 4/1996, do 31 de maio, de caixas de aforros de Galicia

Modifícanse os artigos que seguidamente se relacionan do título III do Decreto legislativo 1/2005, do 10 de marzo, polo que se aproba o Texto refundido das leis 7/1985, do 17 de xullo, e 4/1996, do 31 de maio, de caixas de aforros de Galicia:

Un. O artigo 59 queda redactado nos seguintes termos:

“1. As caixas de aforros, no marco dos principios xerais recollidos no artigo 6 deste texto refundido, desenvolverán a súa actividade financeira con absoluta liberdade, independencia e respecto ás leis.

2. A Xunta de Galicia coidará da transparencia dos mercados e da solvencia das entidades e establecerá os medios necesarios de protección aos clientes.”

Dous. O artigo 61 queda redactado nos seguintes termos:

“Artigo 61. Aspectos fundacionais

A Xunta de Galicia realizará un labor de orientación en materia de acción social, indicando as principais necesidades e prioridades, sen prexuízo da liberdade da caixa de aforros en canto á elección dos destinos concretos do gasto.

Tres. Suprimido.

Catro. O artigo 65 queda redactado nos seguintes termos:

“Artigo 65. Autorización de determinados investimentos

A consellaría competente en materia de política financeira establecerá, en función dos recursos propios ou totais da caixa de aforros ou en relación cunha cantidade ou porcentaxe determinada, a necesidade de autorización previa para os investimentos, directos ou indirectos, en calquera clase de activos- materiais, inmateriais, monetarios ou financeiros-, así como para a concentración de riscos, de xeito directo ou indirecto, nunha persoa ou grupo, sen prexuízo da normativa básica aplicable.

Cinco. Suprimido.

Seis. Suprimido.

Sete. O artigo 74 queda redactado nos seguintes termos:

“Artigo 74. Dotacións das obras sociais

1. De acordo coa súa finalidade e natureza fundacional, as caixas de aforros con enderezo social en Galicia destinarán a totalidade dos seus excedentes que non teñan que aplicar a reservas por mandato legal á dotación de reservas voluntarias, a fondos imputables aos copartícipes e á creación e ao mantemento de obras sociais.

2. No caso de que as caixas encabecen un grupo consolidable de entidades de crédito, o excedente de referencia será o que resulte dos estados contables consolidados.

3. Correspóndelle á consellaría competente en materia de política financeira autorizar os acordos aprobados pola asemblea xeral das caixas de aforros con enderezo social en Galicia, relativos á determinación dos excedentes e á súa distribución consonte a normativa aplicable, así como os relativos aos orzamentos para o exercicio en curso, ás novas obras sociais e á liquidación do exercicio anterior.

4. A consellaría competente en materia de política financeira poderá, mediante convenio, acordar anualmente coas caixas de aforros galegas a porcentaxe dos seus excedentes que dedicarán a obras sociais. No caso de que os sinalados convenios non sexan asinados antes do 31 de marzo de cada exercicio, a dita porcentaxe poderá ser establecida por orde da consellaría competente en materia de caixas de aforros, logo de audiencia das entidades afectadas.

Nos devanditos convenios estableceranse as principais necesidades que deben cubrirse con carácter prioritario, sen prexuízo da liberdade de cada caixa en canto á elección dos destinos concretos do gasto.”

Oito. O artigo 75 queda redactado nos seguintes termos:

“Artigo 75. Destino da acción social

1. As obras sociais deberán respectar os principios de universalidade, publicidade e respecto da competencia, e deberán dirixirse de xeito directo a actuacións relativas á mellora do tecido produtivo galego, ao desenvolvemento tecnoló-

xico e á investigación, á formación profesional e empresarial e á actividade emprendedora, ao fomento do emprego e á educación en todos os niveis, á sanidade pública, aos servizos de asistencia social, á integración de colectivos marginais e con menores niveis de ingresos, á cultura e ao deporte base, especialmente nas áreas xeográficas de actuación da caixa, sen que en ningún caso poida reverter á caixa a través das súas actividades de carácter financeiro.

Será preciso o informe favorable previo da consellaría competente en materia de política financeira para a realización de calquera obra social, propia ou en colaboración, cando o importe que se vaia financiar pola caixa no exercicio vixente e nos dous seguintes sexa superior a 500.000 euros.

2. Para identificar aqueles proxectos concretos que puidesen constituír os destinos da obra social das caixas de aforros tomaranse como referencia os estudos e as análises existentes sobre a realidade socioeconómica de Galicia e aqueles outros que as propias caixas de aforros poidan realizar con especial referencia ao territorio que constitúe a súa zona de influencia. En calquera caso deberanse ter en conta tamén aqueles proxectos que potencien os sinais de identidade de cada caixa de aforros.

3. As caixas de aforros que, non tendo a súa sede social en Galicia, contén con oficinas na comunidade galega deben efectuar investimentos ou gastos en obra social en Galicia, destinando para tal efecto como mínimo a parte do seu orzamento anual da obra social proporcional aos recursos captados en Galicia con respecto ao total da entidade. A consellaría competente en materia de política financeira velará porque os destinos da acción social destas caixas de aforros se adapten ás necesidades galegas.

4. Anualmente as caixas de aforros avaliarán en que medida os proxectos realizados contribuíron a mellorar a situación económico-social de Galicia.

5. Á acción social non xestionada directamente polas caixas de aforros seranlle aplicables os mesmos principios e criterios que á xestionada directamente.

Disposición adicional primeira. Fomento do uso da lingua galega na actividade das caixas de aforros

1. As caixas de aforros, de acordo coa súa vocación social, favorecerán no seu ámbito a normalización progresiva do uso da lingua galega e promoverán o seu uso, tanto nas comunicacións escritas coma orais.

2. As caixas de aforros galegas e as que operen en Galicia deberán ofrecerlles aos seus clientes, no ámbito da Comunidade Autónoma, a posibilidade de formalizar contratos e recibir as comunicacións periódicas que deban realizarlles en galego.

Disposición adicional segunda. Substitución de referencias á consellaría competente en materia de política financeira

As referencias á Consellería de Economía e Facenda contidas no Decreto legislativo 1/2005, do 10 de marzo, polo que se aproba o Texto refundido das leis 7/1985, do 17 de xullo, e 4/1996, do 31 de maio, de caixas de aforros de Galicia, entenderanse realizadas á consellaría competente en materia de política financeira.

Disposición transitoria primeira. Adaptación dos órganos de goberno

1. Sen prexuízo do previsto no artigo 30 do texto refundido da lexislación de caixas de aforros de Galicia, aprobado polo decreto legislativo 1/2005, do 10 de marzo, dados os cambios porcentuais e sectoriais que se introducen, no prazo máximo de dous meses desde a entrada en vigor desta lei, as caixas de aforros con domicilio social en Galicia deberán proceder a renovar a totalidade dos seus órganos de goberno, adaptándoos ás disposicións que se conteñen nesta lei.

2. Se algún dos membros dos novos órganos de goberno desempeñase algún cargo con anterioridade, para o cómputo total do seu mandato deberá terse en conta o tempo que desempeñase o cargo con anterioridade.

3. Se a caixa de aforros tivese comezado algún proceso de renovación dos seus órganos de goberno no momento da entrada en vigor desta lei, suspenderao co fin de comezar uns novos procesos que se adecúen ao previsto nesta lei.

4. Mentres non se produza a constitución dos novos órganos de goberno, a administración, o control e a representación das caixas de aforros seguirán atribuídos aos actuais órganos

de goberno, os cales deberán adoptar os acordos necesarios para a debida execución e cumprimento das normas contidas nesta lei.

Disposición transitoria segunda. Normas para a primeira renovación dos órganos de goberno

1. A asemblea xeral constará de 160 membros, coa seguinte distribución por sectores:

- a) Parlamento de Galicia: 32 membros.
- b) Corporacións locais en cuxo termo teña oficinas a entidade: 32 membros.
- c) As entidades representativas de intereses colectivos: 16 membros
- d) Empregados da caixa de aforros: 16 membros.
- e) Entidades fundadoras: 16 membros
- f) Impositores: 48 membros.

No caso de non existir entidades fundadoras, a representación do Parlamento de Galicia e das corporacións locais será respectivamente de 40 membros.

2. Os conselleiros xerais serán designados nun prazo máximo de corenta días naturais desde a entrada en vigor desta lei do seguinte xeito:

- a) Parlamento de Galicia: 32 membros, ou 40 no caso de non haber fundadores, nomeados polo Pleno por proposta dos grupos parlamentarios, na proporción da composición do Parlamento de Galicia.
- b) Corporacións locais: 32 membros, ou 40 no caso de non haber fundadores, asignaranse por comunidades autónomas en función dos depósitos captados nesa comunidade con respecto dos depósitos totais da entidade. Dous terzos dos representantes de cada comunidade autónoma asignaranse en proporción ao volume de depósitos que supoñan as oficinas situadas no termo municipal sobre o volume de depósitos na Comunidade autónoma. O terzo restante asignarase por sorteo entre as corporacións restantes. No caso de pro-

ducirse decimais, procederase a efectuar o redondeo por defecto e atribuiránselle os restos de xeito proporcional ao decimal máis alto.

c) Entidades representativas de intereses colectivos: catro membros serán nomeados polas confederacións de empresarios de Galicia, catro polas organizacións sindicais máis representativas de Galicia, outros catro polas restantes entidades con representación no Consello Económico e Social de Galicia, non mencionadas anteriormente, que non teñan a consideración de administración institucional ou corporativa e outros catro polas entidades determinadas por orde da consellaría competente en materia de política financeira de entre as asociacións e institucións de carácter económico, social ou cultural de recoñecido prestixio no ámbito territorial de actuación da caixa de aforros, logo de consultadas as caixas de aforros.

d) Empregados da caixa de aforros: 16 membros elixidos mediante sufraxio de entre todo o persoal con máis de dous anos de antigüidade, sen considerar os grupos laborais nin a distribución por categorías.

e) Entidades fundadoras: 16 membros, na mesma proporción que figuren nos estatutos da entidade.

f) Impositores: Os 48 membros distribuiranse por comunidades autónomas en función dos depósitos captados nesa comunidade autónoma con respecto dos depósitos captados nesa comunidade con respecto dos depósitos totais da entidade para o que se procederá a un sorteo notarial directo no que se designarán os 48 titulares e 96 suplentes.

3. Malia o establecido anteriormente, e para garantir a continuidade dos órganos de goberno evitando cambios radicais na súa composición en aras da eficacia, procederase do seguinte xeito:

a) A designación da cota de empregados á que se fai referencia na letra d) da alínea anterior producirase un ano despois da data de constitución da asemblea xeral, e continuarán ata esa data os representantes en exercicio do cargo no momento da entrada en vigor desta lei.

b) En relación coa elección dos membros da asemblea xeral en representación dos impositores aos que fai referencia a letra f) da alínea anterior, procederase do seguinte xeito:

- Unha vez excluídos aqueles que non reúnan os requisitos para pertencer á asemblea xeral, realizarase un sorteo notarial para a designación de entre eles de vinte e catro membros, que se incorporarán á nova asemblea e permanecerán nela durante un período de un ano.

- Os restantes vinte e catro membros serán designados polo procedemento que se sinala na letra f) da alínea anterior.

c) Así mesmo, os actuais representantes dos traballadores nos consellos de administración das caixas de aforros manteranse neles un ano, sen prexuízo dos membros adicionais que puideran incorporarse por incrementarse o número total de membros do consello de administración que lle correspondan a ese sector. O mesmo seralles de aplicación á metade dos membros dos consellos de administración elixidos polo sector dos impositores, sempre e cando cumplan os requisitos para pertencer á asemblea xeral.

4. A asemblea xeral deberá reunirse con carácter extraordinario no prazo máximo de dous meses desde a entrada en vigor deste lei co fin de nomear os novos membros do consello de administración e da comisión de control, segundo as normas recollidas nesta lei.

Disposición transitoria terceira. Adaptación de estatutos e regulamento dos órganos de goberno

No prazo de seis meses desde a entrada en vigor desta lei, as caixas de aforros con domicilio social en Galicia deberán modificar os seus estatutos e regulamentos dos órganos de goberno para a súa adaptación ás disposicións que nela se conteñen.

Disposición transitoria cuarta. Autorización da non aplicación do artigo 26.1.f) do texto refundido da lexislación de caixas de aforros de Galicia, aprobado polo Decreto legislativo 1/2005, do 10 de marzo

Malia o disposto no artigo 26.2 do texto refundido da lexislación de caixas de aforros de Galicia, aprobado polo Decreto legislativo 1/2005, do 10 de marzo, e para os efectos de representar a entidade en fundacións dependentes, a consellaría competente en materia de política financeira poderá autorizar, logo de petición razoada da entidade, a excepción da aplicación do requisito do artigo 26.1.f) do

citado texto refundido para persoas que ocupasen postos nos órganos de goberno no momento da entrada en vigor desta lei e que non continuasen nestes tras a renovación efectuada.

Disposición transitoria quinta. Excepción na aplicación da incompatibilidade prevista no artigo 28 do texto refundido da lexislación de caixas de aforros de Galicia, aprobado polo Decreto lexislativo 1/2005, do 10 de marzo

Aos membros dos órganos de goberno que no momento de entrada en vigor desta lei viñesen desempeñando postos nos órganos de sociedades participadas pola caixa de aforros en máis dun 20% directa ou indirectamente, ou nas que exerzan unha posición de dominio, non lles será aplicable a incompatibilidade establecida no artigo 28 do texto refundido da lexislación de caixas de aforros de Galicia, aprobado polo Decreto lexislativo 1/2005, do 10 de marzo, aínda logo de producida a renovación prevista na disposición transitoria segunda desta lei.

Disposición derogatoria única

Fican derogadas cantas disposicións de igual ou inferior rango se opoñan ao disposto nesta lei.

Disposición derradeira primeira. Desenvolvemento regulamentario

A Xunta de Galicia e a consellería competente en materia de política financeira, no ámbito das súas respectivas competencias, ditarán as normas que requiran o desenvolvemento e a aplicación desta lei.

Disposición derradeira segunda. Autorización para a elaboración dun texto refundido

Autorízase á Xunta de Galicia para que nun prazo de seis meses desde a entra en vigor desta lei elabore un novo texto refundido que substitúa o aprobado polo Decreto lexislativo 1/2005, do 10 de marzo, no que se incorporen os artigos vixentes deste os da actual lei.

Disposición derradeira terceira. Entrada en vigor

Esta lei entrará en vigor o día seguinte ao da súa publicación no *Diario Oficial de Galicia*.

Santiago de Compostela, 23 de decembro de 2009-12-23

Ismael Rego González
Presidente da Comisión

Marta Valcárcel Gómez
Secretaria da Comisión

7. Composición do Parlamento, réxime e goberno interior, organización e funcionamento

7.3. Organización e funcionamento do Parlamento

7.3.3. Convocatorias

– Sesión plenaria (día 29 de decembro de 2009, ás 10:00 horas)

A Presidencia, de conformidade co disposto no artigo 53 do Regulamento do Parlamento, resolveu convocar o Pleno do Parlamento para realizar sesión o próximo día 29 de decembro de 2009, ás 10:00 horas, no pazo do Parlamento.

De acordo coa Xunta de Portavoces e a Mesa, na reunión do día 23 de decembro de 2009, a orde do día da sesión é a seguinte:

Punto 1. Debate e votación do ditame elaborado pola Comisión 3.^a, Economía, Facenda e Orzamentos, na Proposición de lei, G.P. do Bloque Nacionalista Galego, de modificación do Decreto lexislativo 1/2005, do 10 de marzo, polo que se aproba o texto refundido das leis 7/1985, do 17 de xullo, e 4/1996, do 31 de maio, de caixas de aforros de Galicia 08/PPL-0003 (8892)

Publicación da iniciativa, BOPG núm. 85, do 30.09.2009

Publicación da toma en consideración, BOPG núm. 125, do 27.11.2009

Publicación designación Comisión e prazo de emendas, BOPG núm. 127, do 01.12.2009

Publicación correccións erros, BOPG núm. 128, do 02.12.2009

Publicación emendas ao articulado, BOPG núm. 136, do 15.12.2009

Publicación do informe da Ponencia, BOPG núm. 141, do 22.12.2009

Publicación do Ditame, BOPG núm.142, do 23.12.2009

Punto 2. Debate de totalidade do Proxecto de lei de modificación de diversas leis de Galicia para a súa adaptación á Directiva 2006/123/CE do Parlamento Europeo e do Consello, do 12 de decembro de 2006, relativa aos servizos no mercado interior 08/PL-0010 (15720)

Publicación da iniciativa, BOPG núm. 133, do 11.12.2009

Publicación asignación comisión, BOPG núm. 133, do 11.12.2009

Publicación ampl. prazo presentación emendas articulado, BOPG núm. 139, do 18.12.2009

Publicación emendas á totalidade, BOPG núm.142, do 23.12.2009

Punto 3. Toma en consideración da Proposición de lei, de iniciativa lexislativa popular, de fomento do sector naval de Galicia 08/PPLI-0003 (261)

Publicación da admisión a trámite e constitución da Comisión Promotora, BOPG núm. 7, do 23.04.2009

Publicación coñecemento das sinaturas e admisión a trámite, BOPG núm. 108, do 04.11.2009

Santiago de Compostela, 23 de decembro de 2009

José Manuel Baltar Blanco
Presidente en funcións



OFICINA PARLAMENTAR
Parlamento de Galiza

Rúa do Hórreo, s/n. Tel. 0034 981 551 545
Fax. 0034 981 551 420. Fax prensa: 0034 981 551 421
gp-bng@parlamentodegalicia.es
15702 Santiago de Compostela
Galiza



PARLAMENTO DE GALICIA
REXISTRO XERAL ENTRADA
Data asento: 21/12/2009 17:55
Nº Rexistro: 17452
Data envío: 21/12/2009 17:55:17.773

Á Mesa do Parlamento

O Grupo Parlamentar do Bloque Nacionalista Galego (BNG), a través do seu portavoz e ao abeiro do artigo 112 do Regulamento da Cámara, presenta ante esa Mesa a seguinte **EMENDA Á TOTALIDADE**, con petición de devolución, ao Proxecto de lei de modificación de diversas leis de Galiza para a súa adaptación á Directiva 2006/123/CE, do Parlamento europeo e do Consello, do 12 de decembro de 2006, relativa aos servizos no mercado interior [-08/PL-0010 (15720)].

O proxecto de lei de modificación de diversas Leis de Galiza para a súa adaptación á Directiva 2006/123/CE, comunmente denominada Directiva de Servizos, realiza unha transposición da devandita norma comunitaria que profundiza en aspectos problemáticos da mesma sen que se compense con medidas de protección dos cidadáns como usuarios dos servizos.

A Directiva de Servizos establece un marco de desregulación de múltiples sectores económicos da intervención administrativa nunha liña claramente liberalizadora que amosou nos últimos tempos un elevado risco para o funcionamento da economía e para a protección do benestar dos cidadáns.

O Goberno Galego adopta respecto dese marco unha posición conformista, xa que o Proxecto de Lei presentado á Cámara Galega reflicte unha adaptación mimética, desbotando a posibilidade, mesmo no marco que a propia Directiva de Servizos permite, de incorporar cautelas destinadas a preservar dereitos dos cidadáns en canto usuarios dos servizos, e asegurar con iso que a desregulación que se afronta non provocará un deterioro na calidade dos servizos, como aconteceu en supostos recentes



OFICINA PARLAMENTAR
Parlamento de Galiza

Rúa do Hórreo, s/n. Tel. 0034 981 551 545
Fax. 0034 981 551 420. Fax prensa: 0034 981 551 421
gp-bng@parlamentodegalicia.es
15702 Santiago de Compostela
Galiza



PARLAMENTO DE GALICIA
REXISTRO XERAL ENTRADA
Data asento: 21/12/2009 17:55
Nº Rexistro: 17452
Data envío: 21/12/2009 17:55:17.773

de liberalización en sectores estratéxicos con importante incidencia na vida cotiá dos cidadáns (telecomunicacións, enerxía ou transportes).

A redacción das modificacións normativas propostas cingúese a posibilitar un novo marco na prestación de determinadas actividades ou servizos, pondo o acento na maior flexibilidade na intervención administrativa da Xunta de Galiza, esquecendo que a mesma non ten outra finalidade que a de preservar os intereses xerais. Como contrapartida, apenas se inclúen novas exixencias a nivel do texto legal que, aínda dentro dunha lóxica de eliminación de trabas á prestación de servizos, aseguren a calidade dos servizos prestados, e mesmo permitan un control efectivo dos mesmos por parte da administración como garante do interese colectivo de consumidores e usuarios.

Neste sentido, o avance que se adopta no proxecto de Lei respecto da substitución de múltiples controis autorizatorios por meras comunicacións previas, non vai acompañado de referencias á inspección administrativa e aos controis posteriores, o que pode reducir drasticamente, insistimos, a calidade, seguridade e garantías dos servizos prestados. Resulta sorprendente que se reforme un elevado e importante número de normativa que regula a intervención administrativa previa por un procedemento de comprobación posterior, sen referencias ao método de controis periódicos ou plans de inspección. Así mesmo, máis alá do contido legal, nas memorias que pretenden xustificar a adopción do Proxecto de Lei, non se recolle ningunha previsión ao respecto das necesarias reformas administrativas para aplicar a Lei, o que provocará a adaptación á mesma de forma improvisada.



OFICINA PARLAMENTAR
Parlamento de Galiza

Rúa do Hórreo, s/n. Tel. 0034 981 551 545
Fax. 0034 981 551 420. Fax prensa: 0034 981 551 421
gp-bng@parlamentodegalicia.es
15702 Santiago de Compostela
Galiza



PARLAMENTO DE GALICIA
REXISTRO XERAL ENTRADA
Data asento: 21/12/2009 17:55
Nº Rexistro: 17452
Data envío: 21/12/2009 17:55:17.773

Outro aspecto que tampouco aborda o Proxecto de Lei, en relación coa necesaria inclusión de novas medidas relativas ao papel que debe seguir cumprindo a Administración Galega para compensar a mudanza cara a liberalización maior de servizos, son as escasas previsións en materia de reclamacións, non só desde a perspectiva da obriga de facilitar enderezos para poder formulalas, senón de que existan mecanismos efectivos que garantan a resolución xusta das mesmas e a supervisión por parte de órganos administrativos, coa corrección que corresponda fronte aos incumprimentos en que se puidera incorrer.

Tamén é relevante que, nese afán de transposición literal e sen maior análise da realidade galega e polo tanto das consecuencias que a aplicación da doutrina da Directiva de Servizos pode conlevar, o Goberno non acudise ás previsións que a propia norma comunitaria contén relativa á salvagarda dos dereitos lingüísticos e culturais. Ningunha regulación atopamos relativa á obriga dos prestadores de servizos para garantir o necesario respecto do dereito ao uso da lingua propia de Galiza por parte dos usuarios na relación comercial, senón que se acepta sen máis o principio de libre establecemento sen contraprestacións tendo en conta a nosa realidade. O principio de libre prestación de servizos nos estados da Unión Europea non pode descoñecer os dereitos que os cidadáns teñen, particularmente no caso de Galiza, ao respecto pola diversidade e os sinais de identidade, que deben ter un reflexo no texto do Proxecto de Lei.

En suma, á vista do contido do Proxecto de Lei que se resigna a facer unha transposición imitativa da Directiva de Servizos, sen abordar unha adaptación da mesma á realidade galega, sen introducir elementos de tutela administrativa efectiva dos cidadáns en tanto en que usuarios dos servizos sometidos a esta norma, e sen



OFICINA PARLAMENTAR
Parlamento de Galiza

Rúa do Hórreo, s/n. Tel. 0034 981 551 545
Fax. 0034 981 551 420. Fax prensa: 0034 981 551 421
gp-bng@parlamentodegalicia.es
15702 Santiago de Compostela
Galiza



PARLAMENTO DE GALICIA
REXISTRO XERAL ENTRADA
Data asento: 21/12/2009 17:55
Nº Rexistro: 17452
Data envío: 21/12/2009 17:55:17.773

acompañala dunha adaptación, ou cando menos dun plan real e verificábel, do funcionamento administrativo aos requirimentos e regulacións que a propia iniciativa lexislativa contén, formulamos a presente emenda de totalidade, solicitando a súa devolución ao Goberno.

Santiago de Compostela, 21 de decembro de 2009.

Asdo.: Carlos Aymerich Cano

Portavoz do G.P. do BNG.

Asinado dixitalmente por:

Carlos Ignacio Aymerich Cano na data 21/12/2009 17:52:53

BOLETÍN OFICIAL DO PARLAMENTO DE GALICIA
ESTRUTURA

1. PROCEDEMENTOS DE NATUREZA NORMATIVA
 - 1.1 LEIS E OUTRAS NORMAS
 - 1.2 PROXECTOS E PROPOSICIÓNS DE LEI
 - 1.3 OUTRAS PROPOSTAS DE NORMAS
 2. PROCEDEMENTOS ESPECIAIS DE CARÁCTER INSTITUCIONAL
 - 2.1 INVESTIDURA
 - 2.2 MOCIÓN DE CENSURA
 - 2.3 CUESTIÓN DE CONFIANZA
 3. PROCEDEMENTOS DE CONTROL E IMPULSO
 - 3.1 CONTROL SOBRE AS DISPOSICIÓNS DA XUNTA CON FORZA DE LEI
 - 3.2 COMUNICACIÓNS DA XUNTA DE GALICIA
 - 3.3 EXAME DE PROGRAMAS E PLANS
 - 3.4 ACORDOS, RESOLUCIÓNS OU PROPOSTAS DE COMISIÓNS ESPECIAIS OU DE INVESTIGACIÓN
 - 3.5 MOCIÓNS
 - 3.6 PROPOSICIÓNS NON DE LEI
 - 3.6.1 PROPOSICIÓNS NON DE LEI EN PLENO
 - 3.6.2 PROPOSICIÓNS NON DE LEI EN COMISIÓN
 - 3.7 OUTRAS PROPOSTAS DE RESOLUCIÓN
 - 3.8 PROCEDEMENTOS DE CONTROL ECONÓMICO E ORZAMENTARIO
 4. PROCEDEMENTOS DE INFORMACIÓN
 - 4.1 SOLICITUDES DE COMPARECENCIA
 - 4.2 INTERPELACIÓNS
 - 4.3 PREGUNTAS
 - 4.4 RESPOSTAS A PREGUNTAS
 - 4.5 SOLICITUDES DE DATOS, INFORMES E DOCUMENTOS
 5. PROCEDEMENTOS RELATIVOS A OUTRAS INSTITUCIÓNS E ÓRGANOS
 - 5.1 SOLICITUDE AO GOBERNO DO ESTADO DA ADOPCIÓN DE PROXECTOS DE LEI
 - 5.2 PROCEDEMENTOS RELACIONADOS CO TRIBUNAL CONSTITUCIONAL
 - 5.3 VALEDOR DO POBO
 - 5.4 CONSELLO DE CONTAS
 - 5.5 OUTRAS INSTITUCIÓNS E ÓRGANOS
 6. ELECCIÓN, DESIGNACIÓNS E PROPOSTAS DE NOMEAMENTO
 - 6.1 SENADORES EN REPRESENTACIÓN DA COMUNIDADE AUTÓNOMA
 - 6.2 VALEDOR DO POBO E VICEVALEDORES
 - 6.3 CONSELLEIROS DE CONTAS
 - 6.4 TERNA PARA A PROVISIÓN DE VACANTES DO TRIBUNAL SUPERIOR DE XUSTIZA DE GALICIA
 - 6.5 VOGAIS DA XUNTA ELECTORAL DE GALICIA
 - 6.6 MEMBROS DO CONSELLO DE ADMINISTRACIÓN DA COMPAÑÍA DE RADIO-TELEVISIÓN DE GALICIA
 - 6.7 MEMBROS DO CONSELLO ASESOR DE RADIO-TELEVISIÓN ESPAÑOLA EN GALICIA
 - 6.8 VOGAIS DOS CONSELLOS SOCIAIS DAS UNIVERSIDADES DE GALICIA
 - 6.9 VOGAIS DO CONSELLO DE BIBLIOTECAS
 - 6.10 DELEGACIÓN PARA A DEFENSA DE PROPOSICIÓNS DE LEI DO PARLAMENTO DE GALICIA NO CONGRESO
 - 6.11 OUTRAS ELECCIÓN, DESIGNACIÓNS OU PROPOSTAS DE NOMEAMENTO
 7. COMPOSICIÓN DO PARLAMENTO, RÉXIME E GOBERNO INTERIOR, ORGANIZACIÓN E FUNCIONAMENTO
 - 7.1 COMPOSICIÓN DO PARLAMENTO E OS SEUS ÓRGANOS
 - 7.2 RÉXIME E GOBERNO INTERIOR
 - 7.3 ORGANIZACIÓN E FUNCIONAMENTO DO PARLAMENTO
 8. ADMINISTRACIÓN PARLAMENTARIA
 - 8.1 ORGANIZACIÓN E NORMAS DE FUNCIONAMENTO DOS SERVIZOS
 - 8.2 PERSOAL
 - 8.3 ACTIVIDADES DA ADMINISTRACIÓN PARLAMENTARIA
 9. INFORMACIÓNS E CORRECCIÓNS DE ERROS
 - 9.1 INFORMACIÓNS
 - 9.2 CORRECCIÓNS DE ERROS
-



BOLETÍN OFICIAL DO PARLAMENTO DE GALICIA

Edición e subscricións: Servizo de Publicacións do Parlamento de Galicia.
Hórreo, 63. 15702. Santiago de Compostela. Telf. 981 55 13 00. Fax. 981 55 14 25

Dep. Leg. C-155-1982. ISSN 1133-2727